

Paulin di Aquilee, sant, patriarcje e poete

A jerin de stessee tiere e dibot de stessee etât Pauli Diacun e San Paulin, epûr cetant diviers tra di lôr. E je verementri curiose cheste lontanance di spirt e di compartaments fra doi oms che a cresserin e si formarin forsît ae stessee scuele, dal sigûr inte stessee clime politiche e tra lis stessis vicendis storichis. Che a frecuentarin e a conviverin inte stessee cort ducâl: cundut achel si ignorarin.

Al ven di pensâ che la radrîs prime di cheste incomprension e vadi ricercjade inte diviersitât dal çoc di nassinçe; vâl a dî che, se Pauli Diacun al fo dal sigûr gjermanic di sanc e di anim, Paulin al jere impen dissindint dal antîc çoc latin refratari intai rivuarts de siorie langobarde, pluitost disponût a abraçâ la cause di altris barbars contraris ai propis parons, che a metisi in buinis cun chescj.

Paulin al nassè a Cividât circje tal 730. E che si sepi nol semee che al vebi frecuentât altre scuele e ni scoltâts altris mestris che chei de cort ducâl di Pemon, e de curie patriarcjâl di Calist. Tocje culî ameti che il nivel de scuele di Cividât di chei timps al veve di jessi avuâl a chel dai plui famôs centris di studi di chê ete. Dut câs la formazion di Paulin, forsi inferiôr a chê di Pauli Diacun di une bande, si palese par altri superiôr inte materie teologjiche e juridiche.

Al scomençà la sô cariere come mestri di gramatiche, probabilmentri inte stessee scuele che lu veve preparât.

Nuie no si po dî sul cont di ce che al fasè intant des vicendis che a puartarin ae colade dal Langobarts di chenti. Al esist par altri un document che al po palesâ il so ategjament tal moment storic rivât daspò, vâl a dî al timp de rivolte di Rodgaut, duce dal Friûl, cuintri i Francs (775-76). Si trate de donazion che al à vude, par merts no sclarîts, de bande di Carli in Grant dai bens confiscâts al nobil Vualdand di Lavarian, partidant di Rodgaut. Il document al puarte la date dal Jugn 776, o sei pôcs mêis daûr de repression de rivolte dai Langobarts furlans.

L'an daspò, vâl a dî tal 777, Paulin al jere bielzà in France, ae cort di Carli. Lui aduncje al fo un dai famôs leterâts che il re franc al clamà adun inte sô cort, cul fin di prudelâ la riprese culturâl in ducj i siei dominis. E mentri il langobart Pauli al lave a sierâsi inte badie di Montecassino, il gramatic Paulin al jentrave di maestri inte Scuele Palatine, parie cun

Alcuin, Pieri di Pisa, cun Agilbert, cun Arnon, cun Adelard: grup di ilustris inzegns inteletuâi clamâts a seondâ il grandiôs disen imperiâl di Carli il Grant.

Cualchi an daspò (783-86) al fo ae cort di Carli ancje Pauli Diacun: se si pense che il frari langobart al vignive a intercedi par so fradi complici, inte rivolte, di chel Vualdand dal cuâl il gramatic al veve otignût i bens, al è facil capî che tra i doi no po jessi stade cui sa ce confidence.

Tal 787 al murive Sigwalt, ultin patriarcje langobart di Aquilee, che cul re dai Francs nol veve mai vût bogns rapuarts. Carli il Grant i destinà a sucedii Paulin. Cheste siele e fo dal sigûr fate buine dal pape e cussì Paulin, si ben cuintri voie, al tornà in Friûl daspò dîs agns di lontanance. Il patriarcje di Aquilee al

jere un dai plui alts maiorents dal stât Franc. Al è partant naturâl che i rapuarts direts tra Carli e Paulin a sedin lâts dilunc cun frequence, che il patriarcje al fos clamât dispès a cjapâ part aes grandis assembleis dal ream e che il re lu vebi discjolt, dispès, dal so impegn episcopâl par afidai altris impuartants compits.

Ae ativitât pastorâl di Paulin a son leâts, soledut, i siei scrits, che a apartegnin ae ultime part de sô vite e, se si gjave il "Planctus de Herico", a son ducj di contignût teologjic o liturgjic. Lis trê oparis principâls a forin metudis jù inte ocasion dal contrast adozianist, puartât indenant in Spagne di Elipand di Toledo e di Felix di Urgel: a sostignivin chescj che Jesus, tant che om, al podeve dome in maniere improprie clamâsi fi di Diu, tal sens che, tal moment dal batisim par man di Zuan, al sarès stât adotât di Diu. La eresie e fo condanade une prime volte tal sinodi di Ratisbone dal 792, al cuâl al cjapà part ancje Paulin e dulà che al otignì di Carli il Grant la conferme des possessions e dai privileçs che la Glesie di Aquilee e veve gjoldût sot i rê s langobarts, plui altri vantaçs e inmò il dirit di elei liberementri i patriarcjis.

Cuant che al tornà chenti Paulin al veve cjatât come duce dal Friûl, a sucedi al langobart Rodgaut, il nobil salzburghês Indrì, cul cuâl al veve di vê une cierte confidence, in fats par lui al scrivè po un "Liber exhortationis". E plui tant, cuant che Indrì al fo copât a tradiment di une sdrume di ribei a Tersât, in Istrie, Paulin indi vaì la muart cuntun ingusît componiment poetic.

Tal 796 il patriarcje di Aquilee al compagnà Pipin, fi dal re Carli, intune spedizione in Panonie, cuintri i Avârs, e al cjapà part a une assemblee di vescui che si davuelzè tal cjamp militâr, dulà che si discutè sul cont de evanzelizacion di chescj popui. In chê cunvigne Paulin al sostignì l'ûs de persuasion verbâl e de pazienze, co in altris occasions l'ûs de violence e veve dispès comprometût la predicazion cristiane. Al è probabil che in chê volte, dacuardi cul vescul salzburghês Arnon, a forin stabilîts sul cors de Drau i confins dai teritoris che a saressin colâts sot la jurisdizion di Aquilee e chê di Salzburg. Pôc daspò Paulin al rezè a Cividât un concei di vescui, par tratâ la cuestion, che inmò si dibateve, de "prucission" dal Spiritussant ex Patre Filioque e par fissâ des normis disciplinârs.

Paulin al murì a Cividât tal 802.

Inte leterature de Ete di Mieç chest autôr al à une grande impuartance ancje come poete, In fats, oltri ae Regula fidei e al componiment in muart dal duce Indrì, opare sô a son ancje un componiment poetic su lis ruvinis di Aquilee e un pôcs di imnis liturgjics. E inmò, l'Imni di Nadâl e il Carmes de Lazaro. A Paulin a vegnin ricognossûts in prionte sîs imnis de racuelte Narnense: pe Purificazion, pe Cuaresime, pe Resurezion, pes fiestis dai sants Marc, Pieri e Pauli e pe Dedicazion.

(Josef Marchet - tirât fûr da "Friuli uomini e tempi" - test ridusût e voltât par furlan par cure de redazion di Ladins dal Friûl - Jugn 2014)